




ՊԱՇՏՈՆԱԿԱՆ

ԳԵՈՐԳ. ԾԱՌԱՅ ՅԻՍՈՒՍԻ ՔՐԻՍՏՈՍԻ ԵՒ ԱՆՀԱ-
սանի Վամօֆն Աստուծոյ Եպիսկոպոսապէս եւ Կաթու-
ղիկոս Ամենայն Հայոց Ծայրագոյն Պատրիարք Համագ-
գական Նախամեծար Աթոռոյ Արարատեան Առաքելական
Մայր Եկեղեցւոյ Սրբոյ Կաթողիկէ Էջմիածնի

Գերապատիւ Առաջնորդի թեմին Հայոց հարազատ
որդւոյ Մայր Աթոռոյս ողջոյն եւ օրհնութիւն Հայրապե-
տական:

Քաջայայտ է Ձեզ, զի ի վերջին աւուրս անաբեկումն,
թշուառութիւնք եւ սոսկալի արհաւիրք եկին, հանին ի վե-
րայ տարաբաղդ գաւաւկացս, յորոց յոյժ բազումք, թողեալ
զհայրենի տունս եւ զամենայն ստացուածս իւրեանց ի
Տաճկա-Հայաստանի եւ յԱտրպատականի, սարսափահար եւ
խելակորոյս լեալ, ապաւինեցան ի սահմանս մեր եւ այժմ
հազարաւոր թշուառ կանայք եւ անմեղ մանկունք, ծերք
եւ հիւանդք, ժողովեալք աստ ի ս. Էջմիածին եւ ի շրջակայ
գիւղօրայս եւ ի գաւառս, խնդրեն ի Մէնջ եւ յազգայնոց
մերոց զօգնութիւն:

Ի նկատի առեալ մեր դայս աղէտալի հանգամանս, ի

լրումն Կոնդակի մերոյ ի 20 նոյեմբերի անցելոյ 1914 ամի, այսու Հայրապետական Կոնդակաւս յանձնարարեմք Գերապետութեանդ՝ փութով յորդորել զՅանձնաժողովս և զՄասնախումբս Եղբայրական Օգնութեան, զԱստուածահաճոյ ընկերութիւնս, զազգային հաստատութիւնս և զբարեգործ անձինս՝ մասնակից լինել և օժանդակել լիառատ նուիրաբերութեամբ իւրեանց, զի մարթասցուք խնամել և պահպանել զգաղթականս յայսմ ցրտաշունչ եղանակի, կերակրելով զչքաւորս ի սոցանէ և բժշկելով զհիւանդս, թիւորոց բազում է յոյժ։

Զամենայն նուէրս զբամոց առաքել ի ս. Էջմիածին յանուն Սինոդի, իսկ զհանդերձեղէնս՝ յանուն Գլխաւոր Կարգադիր Յանձնաժողովոյ Մայր Աթոռոյս և զառաքմանէն յայտ առնել Մեզ ի գիտութիւն և ի տնօրէնութիւն։

Լիայոյս եմք, զի Դուք, առաջի աչաց ունելով զսոսկալի տառապանս և զյուսահատ կացութիւն գաղթականաց մերոց, ամենայն եռանդեամբ գործեսցիք յօգուտ տարաբաղդ զաւակացս ի թեթեացումն տանջանաց և ի սփոփումն վշտից սոցա։

Գլխաւոր Կարգադիր Յանձնաժողով Եղբայրական Օգնութեան ս. Էջմիածնի, որ ընդ հովանաւորութեամբ և հսկողութեամբ մերով գործէ, ունի հրատարակել կանոնաւորութեամբ զամենայն հաշիւս նուիրատուութեանց և ծախուց։

Օրհնելով զԶեզ և զհայ ժողովուրդն թեմին Զերոյ, աղօթեմք առ Աստուած վասն փրկելոյ զազգն Հայոց յամենայն վտանգից և ի փորձութեանց ժամանակիս։

Ողջ լերուք, գորացեալ շնորհօք ս. Հոգւոյն և օրհնեալ ի Մէնջ. Ամէն։

Ի վերայ իսկականին ստորագր.

Պ Է Ո Ր Պ Ե. ԿԱԹՈՒՂՈՍ ԱՄԵՆԱՅՆ ՀԱՅՈՑ

յ 12 յունուարի 1915 ամի

Ըստ Տոմարիս ՌՅԿԴ

ի Հայրապետութեան մերում Գ. ամի

յԱրարատեան Մայր Աթոռ Ս. Էջմիածնի.

ի Վաղարշապատ

ԳԵՐԱՊԱՏԻ ԱՌԱՋՆՈՐԴԱՅ, ԲԱՐՁՐԱՊԱՏԻ ՓՈԽԱՆՈՐ-
ԴԱՅ ԵՒ ՀՈԳԵՒՈՐ ՀՈՎՈՒԱՅ, ԱՐԺԱՆԱՊԱՏԻ ԱՒԱԳ ԵՐԻՑԱՆՅ
ԵՒ ՔԱՀԱՆԱՅԻՅ, ԲԱՐԵՋԱՆ ԽՈՐՀՐԴՈՅ, ՀՈԳԱԲԱՐՁՈՒԹԵԱՆՅ,
ՎԱՐՁՈՒԹԵԱՆՅ ԵՒ ԵՐԵՍՓՈԽԱՆԱՅ ԵԿԵՂԵՅԵԱՅ ՀԱՅՈՅ, ԲԱ-
ՐԵԳՈՐԾԱԿԱՆ ԵՒ ԱՍՏՈՒԱԾԱՀԱՃՈՅ ԸՆԿԵՐՈՒԹԵԱՆՅ, ԹԵՄԱ-
ԿԱՆ ԵՒ ԹԱՂԱԿԱՆ ԽՈՐՀՐԴՈՅ, ՄԻՈՒԹԵԱՆՅ ԵՒ ՅԱՆՁՆԱԺՈ-
ՂՈՎՈՅ ՀԱՅՈՅ ԱՐԱՆՅ ԵՒ ԿԱՆԱՆՅ, ԺՐԱՋԱՆ ՈՒՍՈՒՑՉԱՅ
ԵՒ ՈՒՍՈՒՑՉՈՒՀԵԱՅ, ԱՋԳԱՅԻՆ ԳՈՐԾԱՅ ԵՒ ԲԱՐԵԳՈՐԾ
ԱՆՁԱՆՅ ԵՒ ԱՄԵՆԱՅՆ ՀԱՅ ԺՈՂՈՎՐԴԵԱՆ, ՀՈԳԵՒՈՐ ԵՒ ՄԻ-
ՐԵԼԻ ՈՐԴԻՈՅ ՅԻՍՈՒՍԱԿԱՆԴ ՈՂՁՈՅՆ ԵՒ ՕՐՀՆՈՒԹԻՒՆ
ՀԱՅՐԱՊԵՏԱԿԱՆ:

Արդէն իսկ քաջայայտ է ամենեցուն դառն կացու-
թիւն և դժուարակիր պայմանք փախստական գաղթականաց
մերոց, որք, զկնի սոսկալի տանջանաց և զրկանաց, հասին
ի սահմանս Մեր և այժմ Յանձնաժողովք և Հաստատու-
թիւնք, Աստուածահաճոյ Ընկերութիւնք և Միութիւնք,
հասարակական գործիչք և բարեսէր անձինք և մանաւանդ
գիւղական ժողովուրդն Հայոց օգնեն և օժանդակեն
բազմաչարչար գաւակաց Մերոց, ըստ օրինակի ողորմած
սամարացւոյն:

Գոհունակութեամբ տեսանեմք յամենայն տեղիս գե-
ռանդագին գործ եղբայրական օգնութեան, որ մխիթա-
րութիւն է սրտի Մերում և պատիւ՝ Հայ ժողովրդեան:

Ի նկատ առեալ զօգուտն փախստական-գաղթական
գաւակաց մերոց և ցանկացեալ Մեր կանոնաւորել զգործ
օգնութեան ի գիւղօրայս և ի քաղաքս Կովկասու՝ համա-
չափ բաշխամբ նպաստից, կազմակերպել յատկապէս զվե-
րադարձ փախստական-գաղթականաց ի Հայաստան և բաջ-
ւոքել զանտեսութիւն և զերկրագործութիւն ի բնակա-
վայրս նոցա, Մեր անհրաժեշտ վարկաք հրաւիրել զպատ-
գամաւորս Յանձնաժողովոց և Միութեանց, Ընկերութեանց
և Հաստատութեանց ի Ս. Էջմիածին, ի 1-ն մարտ ամսոյս,
վասն խորհրդակցելոյ աստ՝ ընդ հովանաւորութեամբ և
անմիջական հսկողութեամբ Մերով՝ յաղագս յիշեալ կարևոր
խնդրոց:

Համաժողովն, զկնի լսելոյ զմանրամասն զեկուցագիրս և զվիճակագրական տեղեկագիրս ներկայացուցչաց, խորհելով և կազմելով զնախահաշիւս վասն պահպանութեան և վերադարձի փախստական-գաղթականաց և վասն բարեւաւման գիւղական տնտեսութեան նոցա, մատուց Մեզ ի տնօրէնութիւն զարձանագրութիւնս և զեզրակացութիւնս իւր:

Ըստ ամենայնի հաճ և հաւան գտեալ ընդ եզրակացութիւնս համաժողովոյն, Մեք հաստատեցաք աստ ի Ս. Էջմիածին ընդ հովանաւորութեամբ և հսկողութեամբ Մերով զկենդրոնական մարմին-գլխաւոր Կարգադիր Յանձնաժողով Եղբայրական Օգնութեան, յանդամակցութիւն որոյ հրաւիրեցաք զչորս ներկայացուցիչս ի Յանձնաժողովոյ Եղբայրական Օգնութեան Մայր Աթոռոյս, զչորս ներկայացուցիչս ի Թեմական Կենտրոնական Յանձնաժողովոյ Երևանայ, զերկուս ի Կենտրոնական Յանձնաժողովոյ, ի Կովկասեան Բարեգործական, Նպաստամատուց, ի Գիւղատնտեսական Ընկերութեանց և ի Յանձնաժողովոյ Հոգեւորականաց և Ծխական Հոգաբարձութեանց Թիֆլիզի, զմինն՝ ի Յանձնաժողովոյ Հայոց, ի Մարդասիրական Ընկերութիւնէ և ի Կուլտուրական Միութենէ Հայոց Բագուայ, զմինն՝ ի Յանձնաժողովոյ, յեկեղեցական Հոգաբարձութենէ և ի Բարեգործական Ընկերութենէ Հայոց Նորոյ-Նախիջևանի, զմինն՝ ի Յանձնաժողովոյ Մոսկուայի և զմինն՝ ի Յանձնաժողովոյ և ի Խորհրդոյ եկեղեցեաց Հայոց Պետրոգրադի:

Բաց յայսմանէ տուաք իրաւունս անդամոց Յանձնաժողովոց և Կազմակերպութեանց Հայոց ամենայն քաղաքաց, որք գործեն վասն փախստական-գաղթականաց Մերոց, ի դէպս ներկայութեան նոցա ի Ս. Էջմիածին, մասնակից լինել ի խորհրդակցութիւնս Գլխաւոր Կարգադիր Յանձնաժողովոյս:

Տալով դիտել Ձեզ ամենեցուն զհաստատութենէ Գլխաւոր Կարգադիր Յանձնաժողովոյս Եղբայրական Օգնութեան, այսու Հայրապետական Կոնդակաւս հրաւիրեմք և յորդորեմք զՁեզ, որդեակք հոգևորք և սիրելիք, յայսմ պատմական վայրկենի ազգային կենաց մերոց, գործել

և աշխատ լինիլ համերաշխութեամբ, բարեգործական ոգևով և ազգասիրական եռանդեամբ յօգուտ փախստական գաղթականաց Մերոց և փութով օգնել Մեզ լիառատ նուիրաբերութեամբ ձերովք, զի ի ձեռն Գլխաւոր Կարգադիր Յանձնաժողովոյ Ս. Էջմիածնի, որ ըստ որոշման Համաժողովոյ է զեկավար ազգային մարմին ընդ հովանաւորութեամբ և հսկողութեամբ Մերով, և ի ձեռն ամենայն տեղական Յանձնաժողովոց և Ընկերութեանց, մարթացուք ի կատար ածել զհաստատեալս ի Մէնջ զեզրակացութիւնս Համաժողովոյն՝ վասն պահպանութեան, վերադարձի գաղթականաց մերոց ի հայրենիս իւրեանց և վասն վերահաստատելոյ անդ զքայքայեալ տնտեսութիւնս և զգիւղօրայս նոցա:

Լիայոյս եմք, զի ամենայն պարտաճանաչ և գիտակից ազգայինք մեր սրտեռանդն ոգևով օգնեսցեն նիւթապէս և բարոյապէս վասն շինարար և փրկարար գործունէութեանս այսորիկ՝ յօգուտ և ի փրկութիւն փախստական-գաղթականաց Մերոց:

Օրհնելով զամենեսեանդ, մաղթեմք ի Տեառնէ պահպանել զձեզ ընդ հովանեաւ Աջոյ Իւրոյ, փրկել զազգն Հայոց ի փորձութեանց և ի թշնամեաց և պարգեւել Հայաստան երկրի զխաղաղութիւն և զբարգաւաճութիւն կատարեալ:

Ողջ լերուք, զօրացեալ շնորհօք Ս. Հոգւոյն և յաւէտ օրհնեալ ի Մէնջ. Ամէն:

Ի վերայ իսկականին ստրագր.

ԳԵՈՐԳ Ե.

ԿԱԹՈՒՂԻԿՈՍ ԱՄԵՆԱՅՆ ՀԱՅՈՑ

Ի 21-ն մարտի 1915 ամի

ըստ տոմարիս ՌՅԿԴ

ի Հայրապետութեան Մերում Դ. ամի
յԱրարատեան Մայր Աթոռ Ս. Էջմիածնի

ի Վաղարշապատ

Թ. 462